



L'edification de la tour de Babel, qui fut discontinuée par la permission de Dieu, en la confusion des langues.

LORS que la terre vniuerselle estoit d'un mesme langage, aduint que plusieurs se partirent d'Orient, qui trouuerent vn champ en la terre de Sennar, où ils habiterent : Mais craignans vn second Deluge, conclurent ensemble d'edifier de brique, & d'argile, vne Cité avec vne tour d'extrême hauteur, de laquelle le sommet iroit iusques au Ciel. Le chef de cette entreprise fut le Geant Nembrod, fils du fils de Cham, l'un des fils de Noé; homme superbe, & prompt à executer ses hautes entreprises, lequel se persuadoit que les autres se deuoient soubmettre à sa volonté, & fit tant, que peu à peu il reduit en tyrannie & oppression le gouvernement premier d'entr'eux. Cette tour donc fut esleuée d'une hauteur & espoisseur admirable : car chacun d'eux y trauailloit d'un grand courage, esperant par cét edifice, que nul deluge d'eau ne les pourroit offenser, Mais le Seigneur, qui ne veut permettre aucune entreprise contre sa Maiesté, changea leur langage en sorte qu'ils ne s'entendoient point l'un l'autre; dont aduint vne telle confusion & debat entr'eux, qu'ils furent contrains quitter ce superbe bastiment, qui depuis fut nommé Babel. Or en ce temps plusieurs generations furent de grande renommée, dont entr'autres, Abraham fils de Tharé, fut le dixiesme d'apres Noé, duquel est venu vn peuple inombrable. *Genese 11. Chap.*